

4. gr.

Tímakaup prófnefndarmanna skal vera hið sama og prófdómara í iðnskólum, og skal fylgja þeim breytingum, sem kunna að verða á því.

Þóknunin miðast við, að prófnefndarmenn undirbúi og dæmi próf, en hafi, ef þörf gerist, eftirlitsmann til yfirsetu á prófstað, sbr. 31. gr. reglugerðar um iðnfræðslu. Slíkt leysir þó ekki prófnefndarmenn undan þeirri skyldu, að fylgjast með framkvæmd sveinsprófa.

5. gr.

Við skiptingu þóknunar milli prófnefndarmanna skal fylgja eftirfarandi reglu:

Þóknun prófnefndar skal deilt í 4 hluta, og fær hver prófnefndarmaður einn hlut. Fjórða hlutanum skal skipt þannig, að formaður prófnefndar fær $\frac{1}{2}$ hlutann, en hvor hinna prófnefndarmanna $\frac{1}{4}$ úr hlut.

6. gr.

Annan kostnað við sveinspróf en þóknun prófnefndar greiðir meistari próftaka, sbr. 31. og 47. gr. reglugerðar um iðnfræðslu.

7. gr.

Ríkissjóður endurgreiðir lögreglustjórum (bæjarfógetum og sýslumönnum) útlagðan kostnað vegna prófnefnda og skal iðnfræðsluráð í umboði ráðuneytisins úrskurða réttmæti reikninga, áður en endurgreiðsla fer fram.

8. gr.

Reglur þessar gilda þar til annað verður ákveðið.

Menntamálaráðuneytið, 5. október 1967.

F. h. r.

Birgir Thorlacius.

Knútur Hallsson.

REGLUGERÐ

um heimilishjálp í Snæfellsness- og Hnappadalssýslu.

1. gr.

Kvenfélagasamband Snæfellsness- og Hnappadalssýslu fer með stjórn heimilishjálpar í sýslunni undir yfirstjórn sýslunefndar.

Dagleg umsjón með framkvæmdum heimilishjálparinnar skal vera í höndum sérstaks fulltrúa kvenfélagasambandsins, og á hann rétt á að sitja fundi sýslunefndar, þegar rædd eru mál er varða heimilishjálp. Hann hefur þar málfrelsi og tillögurétt.

2. gr.

Hlutverk heimilishjálparinnar er að veita hjálp á heimilum, þegar sannað er með vottorði læknis, ljósmóður eða á annan hátt, sem fulltrúi heimilishjálpar tekur gilda, að hjálpar sé þörf um stundarsakir sökum sjúkdóms, barnsburðar, slysa, dauðsfalla eða af öðrum ástæðum.

Hjálpin skal að jafnaði ekki veitt til lengri tíma en 14 daga. Öldruðu fólki, og þar sem slys ber að höndum, má þó veita aðstoð til lengri tíma, í samráði við fulltrúa heimilishjálparinnar.

3. gr.

Heimilt er yfirstjórn heimilishjálparinnar að skipta sýslunni í allt að þrjú starfssvæði, og leitast við að ráða að minnsta kosti eina stúlku á hvert starfssvæði. Þó er fulltrúa heimilishjálparinnar heimilt að láta starfsstúlku fara á milli starfssvæða, ef nauðsyn krefur og ástæður leyfa.

Fulltrúinn skal ganga örugglega úr skugga um að það fólk, sem stundar heimilishjálp á vegum sýslunnar sé hæft til starfsins, og hafi heilbrigðisvottorð frá lækni.

Um launakjör og hlunnindi starfsfólksins skal stjórn kvenfélagasambandsins hafa samráð við oddvita sýslunefndar.

4. gr.

Sýslunefnd og stjórn kvenfélagasambandsins ber ekki fjárhagslega ábyrgð á tjóni, sem fólk er vinnur á vegum heimilishjálparinnar kann að valda með störfum sínum.

5. gr.

Stjórn heimilishjálparinnar ákveður, hvert form skuli vera á umsóknum um heimilishjálp.

Hver hreppsnefnd getur veitt eftirgjöf á greiðslu fyrir heimilishjálp að nokkru eða öllu leyti, að fenginni tillögu fulltrúa heimilishjálparinnar.

6. gr.

Þeir, sem njóta heimilishjálpar, skulu greiða $\frac{2}{3}$ hluta launa hjálparfólks, þó með þeim fyrirvara sem um getur í 5. grein.

Framkvæmdarstjórn heimilishjálparinnar setur nánari reglur um greiðslur, innheimtur og annað í sambandi við ráðningu starfsfólks, er hún telur máli skipta í þessu efni. Skal um slíkt hafa samráð við oddvita sýslunefndar, og leita eftir staðfestingum ráðherra á þeim reglum, ef nauðsynlegt þykir.

7. gr.

Halli, sem verða kann af heimilishjálp, sem veitt er samkvæmt lögum um heimilishjálp í viðlögum, og samþykktum þessum, greiðist að $\frac{1}{3}$ úr ríkissjóði en $\frac{2}{3}$ úr sýslusjóði, sem endurkrefur þau hreppsfélög, sem eru aðilar að starfsemi, um helming þeirrar fjárhæðar miðað við íbúafjölda 1. des. næsta ár á undan, en að hálfu miðað við veitta vinnu til hvers sveitarfélags.

8. gr.

Fulltrúi heimilishjálparinnar annast daglegar greiðslur og reiknishald, og skal ársreikningum skilað til sýslumanns eigi síðar en 1. apríl ár hvert.

Reikningar heimilishjálparinnar skulu endurskoðaðir á sama hátt og reikningar sýslusjóðs.

9. gr.

Reglugerð þessi tekur gildi fyrir hvern hrepp innan sýslunnar, þegar hún hefur verið samþykkt af viðkomandi hreppsnefnd, og sýslunefnd Snæfellsness- og Hnappadalssýslu hefur staðfest hana samkvæmt lögum nr. 10 frá 25/1 1952, um heimilishjálp í viðlögum.

Reglugerð þessi, sem sýslunefnd Snæfellsness- og Hnappadalssýslu hefur samþykkt, staðfestist hér með, samkvæmt lögum nr. 10. 25. janúar 1952 um heimilishjálp í viðlögum til þess að taka gildi þegar í stað og birtist til eftirbreytni öllum þeim, sem hlut eiga að máli.

Félagsmálaráðuneytið, 6. október 1967.

F. h. r.

Hjálmar Vilhjálmsson.

Jón S. Ólafsson.

REGLUGERÐ

um breyting á reglugerð nr. 79 frá 27. maí 1960, um skipan gjaldeyris- og innflutningsmála o. fl.

1. gr.

Ný 3. málsgrein. 7. gr. reglugerðarinnar orðist svo:

Viðskiptamálaráðuneytið ákveður, að höfðu samráði við Seðlabankann, skilyrði, sem innflytjendur hvers konar vara þurfa að fullnægja við gjaldeyriskaup eða innlausn vöruskjala, þar á meðal innborganir fjár, sem heimilt er að binda í banka-reikningi um ákveðinn tíma. Ákvæði þetta getur einnig náð til gjaldeyriskaupa til annars en vörukaupa, samkvæmt nánari ákvörðun ráðuneytisins.

2. gr.

Reglugerð þessi er sett samkvæmt lögum nr. 30 25. maí 1960, um skipan innflutnings- og gjaldeyrismála o. fl., og öðlast gildi nú þegar.

Viðskiptamálaráðuneytið, 27. október 1967.

Gylfi Þ. Gíslason.

Þórhallur Ásgeirsson.

REIKNINGUR

berklavarnasjóðs Ólafs Halldórssonar.

Ársreikningur 1964, 1965 og 1966.

Höfuðstóll:

Eign 1. janúar 1964 skv. birtum reikningi	kr. 6 402.71
Aukning skv. eftirfarandi reikningi	— 1 800.25

Kr. 8 202.96